



Kā Roimata

Nā Charisma Rangipunga



Kā Roimata

◆ **Nā Charisma Rangipunga | Nā Remy me Ariki Creative ngā Pikitia Whakaari** ◆



Ko Kā Roimata te tamāhine a te Ariki nui o Ngāi Tahu, ko Te Maiharanui, me tana wahine a Te Whe. Ko ia tērā te kuru auhunga o tōna pāpā.

8




He nui ngā pakanga i waenganui i a Ngāi Tahu me Ngāti Toa. Ko te tino take o ngā pakanga nei ko te whai whenua, ko te whai rawa, ko te whai mana, ā, i aua wā ko Te Rauparaha te tino rangatira o Ngāti Toa. He tokomaha i hinga i ngā whawhai nei.



Mai i tōna kāinga i te motu o Kāpiti i āta whakarite a Te Rauparaha i a ia anō mō ngā pakanga. I whakahaohoa ia i a Kāpene Stewart, kia eke rātou ko tōna ope taua mā runga i tōna kaipuke ko Irihapeti. Mā reira tere atu ai rātou ki Akaroa, te kāinga o Te Maiharanui.



I tō rātou taenga atu ki Akaroa, i wāhi kē atu a Te Maiharanui. I tukua ētahi matakirea kia rapu i a Te Maiharanui, kia pōwhiri atu ki a ia kia eke mā runga kaipuke. Ko te poapoa hoki ko te kai, ko ngā koha, ko ngā pū.



I te rā tuatoru i tae atu a Te Maiharanui rātou ko tana wahine a Te Whe,
me tā rāua tamāhine. I eke rātou ki runga hei tūtaki atu ki te Kāpene.
Ka kuhu rātou ki te whare o te Kāpene, ka puta mai a Te Rauparaha, ā, ka
mauheretia te whānau rā.

I ngā kāinga, i ngā pā hoki e tata ana ki
Akaroa tē paku mōhio te iwi rā i te ahatia tō
rātou ariki i taua kaipuke.



Ka tō te rā, ka kumanu atu ngā toa ki uta. Kāore tētahi i rongo i a
rātou heoi ka turakina ngā pā, me ngā kāinga. Tokomaha i whara,
tokomaha atu anō i mate. I werangia hoki ko aua papa kāinga.



I rongo kau a Te Maiharanui i te umere, i te tangi. Ka kitea hoki ko te ahi e kai ana i ngā kāinga. Mā reira ka mōhio pū ka ahatia ia, ka ahatia hoki tana tamāhine e Te Rauparaha. Ka hikina te punga, kua hoki atu te kaipuke ki Kāpiti, me tere āna whakaritenga.



Ahakoa i mōhio a Te Maiharanui ka kore rawa
ia e kite anō i tana tamāhine i whakatau rāua
ko Te Whe kia tuku i tā rāua tamāhine ki a
Tāwhirimātea, he tohu i tā rāua kōtiro i ngā
mahi tūkino a Te Rauparaha.



I a ia e moe ana i tīkina a Kā Roimata e Tāwhirimātea. Ka rere atu rāua i Te Waipounamu ki te pito whakatetonga rawa. Ka tae rāua ki Te Ara a Kiwa. Ka oho mai te kōtiro rā, ka uiia a Tāwhirimātea kei whea rā ōnā mātua. I mea atu a Tāwhirimātea “Inangeto ka tae ki Kapiti.”



Ka tangi, ka hotu a Kā Roimata i ōna mātua i ngaro atu rā ki Kāpiti.
Ka whakamīharo a Tāwhirimātea i te ātaahua o ngā roimata o te
kōtiro rā, ka tīkina atu, ka kōpaktia ki te anga, ā, ka totohu ngā
roimata rā ki te papa moana, hei tio.



I waiho atu a Tāwhirimātea i Te Hautonga Mauri, he hau kaha kia tiakina ngā tio o Ka Roimata, hei tohu whakamaumahara ki a Ngāi Tātou kia kauraka e kaiapu, kia tiakina ko ēnei tino taonga, kia aroha hoki tētahi i tētahi.

